

Standing ovation per Berset

Il parlament svizzer elegia il nov president federal cun 190 vuschs

■ **(anr/am) I n'era nagina surpraisa – schon avant l'elecziun han bandierels fatg sgulatschar la bandiera dal chantun Friburg sin la piazza federala a Berna. Ier è Alain Berset da Friburg, vicepresidente da l'onn 2017, vegni elegi cun in bun resultat sco president da la confederaziun per l'onn 2018.** Cun quai segua el a partir da l'emprim da schaner sin *Doris Leuthard* ch'occupa quel post quest onn. Da las 210 vuschs valaivlas èn 190 idas a favur dal socialdemocrat. Quai è il terz meglier resultat dals ultims diesch onns. Cun in lung applaus e standing ovations ha l'assemblea federala prendì en consegna l'elecziun. Per Berset, ch'è al chau dal Departament federal da l'intern, è quai l'emprima giada ch'el dastga occupar quest uffizi. Vicepresident per l'onn 2018 vegn *Ueli Maurer* cun 178 vuschs. Maurer era già l'onn 2012 vicepresidente e l'onn sissur president da la confederaziun.

In'egliada sur l'ur da noss plat

«J'aimerais vous remercier ici de votre confiance», engrazia Berset en sia lingua materna a las parlamentarias ed als parlamentar. E cun ina purziun laud da sasez, betg persunalmain dad el, mabain da nus tuts, dat el in sguard en l'avegnir: «Wir können zuversichtlich auf das kommende Jahr zugehen: Wir leben in einem sicheren und wohlhabenden Land.» Modest constatescha el però che quai na sa chapeschia betg da sez. In avantatg da la Svizra saja che nus sajan sfurzads da s'interessar in per l'auter. Noss sistem politic pretendia che nus tuts dettian in'egliada sur l'ur da noss plat. Quai pretendia da l'autra vart era l'abilitad da far cumpromiss. Magari

dovri er in bun tant da quest'abilitad per schliar las sfidas da l'avegnir. Berset vesa talas sfidas oravant tut en la politica sociala, l'egualitad tranter umens e dunas, la digitalisaziun, la politica fiscala, la dumonda d'energia, il cumbat encunter la midada dal clima e la politica europeica da la Svizra. «Wir wissen, dass unser Engagement für den nationalen Zusammenhalt und für eine faire Gesellschaft nie zu Ende ist. Das ist der Kern unseres Erfolges. Wir nehmen alle mit. Wir sind weder Maximalisten noch Minimalisten, wir sind Realistinnen und Realisten.»

Per Berset sa definescha la Svizra tras sia cultura, ses respect envers minoritads e sia varietad linguistica. Che quai n'è betg be ina floscla demussa el pront cun il gèst da duvrar tut las quatter linguas naziunalas en ses pled. «Nossa stabilitad sociala – che è er impurtanta per l'eco-

nomia – pretenda che nus faschain atenziun, co ch'i va als pli flaivels.»

Medem sco tschels, ma auter

Mintg'onn en la sessiun d'enviern vegn elegi in dals cussegliers federals sco president da la confederaziun. En il 19avel tschientaner era quest'elecziun in'onuraziun per cussegliers federals ch'eran spezialmain stimads. Ozendi survegn mintga cusseglier federal almain ina giada en set onns il post sco president. L'elecziun n'è normalmain betg dispaivla. Il president da la confederaziun n'ha en Svizra ensasez betg dapli dretgs ch'ils auters cussegliers federals. El maina dentant sco primus inter pares las sesidas emnilas dal cussegl federal. El n'è però betg il schef dal stadi sco per exempel en la Germania u en l'Austria. En prima lingua ha el ina funcziun represchentativa entaifer Svizra ed en l'exteriur.



Gist suenter l'elecziun èn il nov president da la confederaziun Alain Berset ed il nov vicepresidente Ueli Maurer – flancads da duas salteras – vegnids saramentads.